

Inuusuttut nunanut allanut oqaatsinik ilinniariarlutik aallartartut amerlanerulernissaat anguniarlugu, Naalakkersuisut suliamik aallartitsinissamik peqquneqarnissaannik, Inatsisartut aalajangiiffigisassaattut siunnersuut.
(Inatsisartunut ilaasortaq Malik Berthelsen, Siumut)

Akissuteqaat

(Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq)

Siullermeerneqarnera

Inuusuttut amerlanerusut nunanut allanut aallarlutik oqaatsinik ilinniarnissaannut periarfissineqarnissaat pillugu Malik Berthelsenip siunnersuutaanut Naalakkersuisut qujassuteqarput. Siunnersuuteqartup oqaatigaa imaattariaqanngitsoq angajoqqaat akissaqarnerusut kisimik qitornaminnik nunanut allanut oqaatsinik ilinniarnissaq siunertarlugu aallartitsisassasut. Kiisalu siunnersuuteqartoq isumaqarpoq efterskoleqarnermut aqqissuussinerup iluani inuusuttut nunanut allanut angalasinnaanissaannut aningaasartuutissanik nassaartoqarsinnaasoq. Naalakkersuisut maluginiarpaat Malik Berthelsenip siunnersuutini tassunga tunngatillugu § 36, imm. 1 tunngavigalugu apeqquteqaatiminut nangitsissutitut siunnersuutigigaa.

Inuusuttut nunanut allanukarlutik oqaatsinik ilinniarsinnaanissaannut periarfissat pitsaanerulersinnissaannut siunnersuutit siusinnerusukkut Inatsisartut arlaleriarlutik eqqartortareerpaat, kingullermik Inatsisartut 2008-mi ukiakkut ataatsimiinneranni siullermeerneqarmat. Siunnersuulli atorunnaarsinneqarpoq 2009-mi Inatsisartut upernaakkut ataatsimiinnissaat taamaatinneqarmat Inatsisartunut qinersinissap nalunaarutigineqarnera pissutigalugu. Periarfissaq manna atorlugu Naalakkersuisut erseqqissaatigerusuppaat inuusuttut nunanut allani najugaqarsinnaanissamut pitsaasunik periarfissaqarnissaat pingaaruteqarmat, tassa apeqqutaatinnagu angajoqqaat isertitatigut qanoq inissisimanersut, tassami misilittakkat takutereerpaat inuusuttut nunani allani najugaqarnermikkut isumassarsianik nutaanik pissarsisartut, inersimaneruler-tartut, nunatta avataani pissutsinik isigisaqarnerulersartut, tamakkualumi inuiaqatigiinni ilua-qutaas-arput.

Naalakkersuisut makkua oqaatigerusuppaat:

Inuusuttut nunanut allanut oqaatsinik ilinniarnissaq siunertarlugu najugaqartartut nunat tamat akornanni paarlaaseqatigiittarnermik ingerlatsiviit kattuffii namminersortut, pingaartumillu AFS aqqutigalugu, kisianni aamma kattuffiit namminersortut allat aqqutigalugit angalanissamut aningaasartuutitik akilersittarpaat, tamannalu Namminersornerullutik Oqartussat nalunaarutaanni nr. 8 7. marts 2008-meersumi ilinniagaqarnerisutitut tunngasuni § 58, imm. 1-3-mi allassimavoq. Paragrafimi pineqartumi allasimavoq Kalaallit-nunaanni angerlarsimaffimmiit nunami allami ornitassamut uterlugulu angalaneq akilerneqartartoq nunami allamiinneq qaammatit arfinillit sinnerlugit sivissuseqarpat. Oqaatsinik Pikkorissarfik, angalanernik pineqartunik allaffissormikkut ingerlatsisartuq tamatumunnga ukiumut 500.000,- kr-inik aningaasaliiffigineqartarpoq. Ukioq 2009 850.000,- kr-ininik atuiffiusimavoq.

Oqaatsinik Pikkorissarfiup paasissutissiinera naapertorlugu qaammatini qulini nunani allamiinneq nalinginnaasumik 45.000 kr-nit 70.000 kr.-nillu akornanni annertussuseqartarpoq, taakkununga ilaavoq timmisartumik angalaneq, taannalu angajoqqaanut utertinneqartarpoq.

Taakkua saniatigut qallunaat ilinniarnermut ministeriaqarfiat (undervisningsministeriet) inuusuttunut nunani allaniittunut 18-it inorlugit ukiulinnut 10.000 kr.-inik tapiissuteqartarpoq, aamma kalaallinut inuusuttunut. Tamakkua saniatigut kommunit inuusuttaminnut nunani allaniittunut kommunimiit kommunimut allanngorartunik 25.000 kr. tikillugit atuartumut ataatsimut tapiissuteqartarput. NunaFonden qinnuteqartut tunngavigalugit kr. 10.000,00-inik tapiissuteqartarpoq.

Atuartunut Danmarkimi efterskolini atuartussanut atuarfimmumut uterlugulu angalanerinit aningaasartuutaat tapiissutigineqartarput. Taakkua saniatigut Danmarkimi efterskolini atuartut atuartumut ataatsimut efterskolimiinnerannut sap. ak. 281,00 kr.-inik tapiissutigineqartarput. Tassa imaappoq atuartup ataatsip efterskolemiinneranut angalanermut aningaasartuutit ilanngullugit ukiumut 20.000 kr- missiliorlugit tapiissutigineqartarput.

Naalackersuisut efterskolimiititsinermut kiisalu nunani allaniititsinermut aningaasartuutitut tunngasutigut misissueqqissimapput. Namminersorlutik Oqartussat, undervisningsministeriap, NunaFonden-ip kommunillu tapiissutai tunngavigalugit, Naalackersuisut nalilerpaat angajoqqaat qitornaminnik nunani allaniititsinermi akiliutaat taavalu angajoqqaat qitornamik Danmarkimi efterskolemiinnerannut akiliutaat annertoqatigiittut. Tassa inuusuttut nunami allamiikkunik imaluunniit efterskolimiikkunik aningaasatigut periarfissaat assigiittut.

Inuusuttut ukiumut 60-it 70-it akornanniittut nunanut allanut paarlaateqatigiittarnerit atorlugit ingerlasarnerat paasillugu nuannerpoq, taamaaliortartullu amerliartorput. Naalackersuisut maluginiarpaat inuusuttut nunanut allanukarsinnaanerit pillugu periarfissatigut siunnersuisarneq eqqumaffigineqarnerusariaqartoq, pingaartumillu tapiiffigineqarnissamut periarfissat pioreersut tungaasigut. Tamanna pissaaq Piareersarfik ammalu Sunngu aqutugalugit ilitersuinikkut.

Naalackersuisut taamatut oqaaseqarlutik innersuusutigaat siunnersuut ilalerneqassanngitsoq.